



Proba RAE-HISD301, de carácter específico, para o acceso ás ensinanzas de ciclo de grao superior en Hípica

Resultados de aprendizaxe, criterios de avaliación e proba asociada:

1. Inspecciona pé a terra un percorrido de saltos do nivel dunha proba de 1,35 m GP, identificando o trazado e analizando as súas características e de cada obstáculo determinando as decisións técnicas que empregará durante a monta.

a) Identificáronse as características e dificultades técnicas de cada obstáculo de xeito illado.

b) Analizouse o deseño do percorrido en relación coas dificultades técnicas dos obstáculos e do trazado en xeral e das características dos cabalos propostos.

c) Relacionáronse as decisións técnicas na monta coas dificultades producidas polo obstáculo en particular e a súa relación cos demais.

d) Identificáronse as distancias que separan os obstáculos que forman combinación e as rúas condicionadas.

e) Relacionouse a distancia entre obstáculos e as características de diferentes cabalos, xustificando o número de trancos elixido en cada caso.



Proba asociada: proba de valoración do percorrido de saltos antes da monta.

• Logo da revisión e a análise pé a terra do percorrido de saltos, expoñerá a súa opinión técnica sobre este e responderá ás preguntas do tribunal sobre: deseño do trazado, as posibles decisións técnico-tácticas relacionadas con este e o perfil dos cabalos propostos polo tribunal.

2. Realiza, dacabalo, un percorrido de saltos correspondente a unha proba de 1,35 m GP, coa vestimenta e equipamento adecuados, executando os exercicios de salto ao aire de galope con seguridade, eficacia e demostrando o dominio técnico correspondente ao nivel da proba.

a) Elixiuse o equipamento e a vestimenta de acordo co regulamento de saltos.

b) Montouse o cabalo con seguridade polo trazado correcto, con ritmo, cadencia, á man de galope adecuada, con impulsión, equilibrio e rectitude, superando todos os obstáculos.

c) Realizouse a acometida dos obstáculos no punto correcto de batida, en perfecto equilibrio e acompañando ao cabalo adecuadamente e mostrando corrección na técnica aplicada.

d) Executouse a recepción do obstáculo, equilibrando ao cabalo correctamente e retomando o ritmo de galope e impulsión adecuada á man correspondente. Proba asociada: proba práctica de salto, montado.

• O binomio preséntase equipado e con indumentaria específica. • Executa unha proba de salto de 1,35 m GP, ao galope cunha velocidade aproximada de 350 m.p.m., de 10 obstáculos de diferentes tipos, cunha combinación dobre e unha combinación tripla e unha rúa, como mínimo, condicionada, todo iso segundo o regulamento en vigor da disciplina de Salto.



3. Analiza unha reprise de nivel relativamente avanzado (Intermedia I), segundo o regulamento de doma clásica en vigor, identificando as dificultades técnicas da proba e determinando as tácticas e comportamentos técnicos necesarios.

a) Identificouse a reprise que ten o nivel técnico de Intermedia I, de entre as propostas polo tribunal.

b) Analizáronse as dificultades técnicas de cada unha das figuras compoñentes da reprise de nivel relativamente avanzado.

c) Relaciónáronse as técnicas de monta aplicables coa dificultade técnica de cada unha das figuras da reprise e a súa relación coas demais.

d) Relacionouse o comportamento técnico-táctico do xinete ou da xinete coas dificultades técnicas da reprise, as características de diferentes cabalos e as posibles continxencias que puidesen presentarse.

Proba asociada: proba práctica de valoración da reprise antes da monta.

• Á presentación de varias follas de reprises non identificadas, o alumnado seleccionará a do nivel requirido, expoñerá a súa opinión técnica sobre esta, e responderá ás preguntas do tribunal sobre as características técnicas da reprise, as posibles decisións técnicas e tácticas relacionadas con esta e o perfil dos cabalos propostos polo tribunal.

4. Monta dacabalo en pista, coa vestimenta e equipamento adecuados, executando os exercicios de doma clásica de nivel relativamente avanzado, aos tres aires con seguridade, eficacia e demostrando o dominio técnico correspondente ao dito nivel e mostrando a técnica suficiente para abordar os exercicios característicos do nivel avanzado.

a) Elixiuse o equipamento e a vestimenta de acordo co regulamento de doma clásica.

b) Demostrouse o dominio e técnica suficiente para superar a totalidade e cada unha das figuras da reprise do nivel relativamente avanzado (Intermedia I).



c) Demostrouse o dominio e técnica suficiente para presentar os exercicios característicos do nivel avanzado (Intermedia II).

Proba asociada: proba práctica de doma clásica, montado.

• O binomio preséntase equipado e con indumentaria específica. • Executa unha proba de nivel relativamente avanzado (Intermedia I), nunha pista de 60×20 m, e mostra a técnica suficiente durante a presentación dos exercicios característicos do nivel avanzado (Intermedia II), todo iso segundo o regulamento en vigor de doma clásica.

5. Inspecciona pé a terra un percorrido de campo a través (cross) do nivel dunha proba de concurso completo de equitación 2* (categoría dúas estrelas), identificando o trazado e analizando as súas características e de cada obstáculo determinando as decisións técnicas a empregar durante a monta.

a) Identificáronse as características e as dificultades técnicas de cada obstáculo de xeito illado e das súas alternativas.

b) Relacionouse o punto de batida, o aire e a velocidade de chegada coas características de cada obstáculo do percorrido.

c) Analizouse o deseño do percorrido en relación coas dificultades técnicas dos obstáculos e do trazado en xeral e das características dos cabalos propostos.

d) Relacionáronse as decisións técnicas na monta coas dificultades producidas por cada obstáculo, a súa relación cos demais, e as características dos cabalos propostos.

e) Identificáronse os obstáculos que forman combinación e a distancia entre eles, así como as alternativas que se ofrecen en cada caso.



Proba asociada: proba de valoración do percorrido de campo a través (cross) antes da monta.

• Logo da revisión e análise pé a terra do percorrido de campo a través (cross), expoñerá a súa opinión técnica sobre este e responderá ás preguntas do tribunal sobre o deseño do trazado e as posibles decisións técnico-tácticas relacionadas con este e co perfil dos cabalos propostos polo tribunal.

6. Realiza, dacabalo, un percorrido de campo a través (cross) do nivel dunha proba de concurso completo de equitación 2* (categoría dúas estrelas), coa vestimenta e equipo adecuados executando os exercicios de salto ao aire conveniente, con seguridade, eficacia e demostrando o dominio técnico correspondente ao nivel da proba.

a) Elixiuse o equipamento e a vestimenta de acordo co regulamento de concurso completo de equitación.

b) Demostrouse o dominio e técnica suficiente mantendo o aire de galope de campo á velocidade de 550 m.p.m. con seguridade, superando todos os obstáculos.

c) Realizouse a acometida do obstáculo polo lugar e punto correcto de batida, en perfecto equilibrio, acompañando o cabalo adecuadamente e mostrando corrección na técnica aplicada.

d) Demostrouse o dominio e técnica suficiente na recepción do obstáculo, equilibrando ao cabalo correctamente e retomando o ritmo e impulsión adecuada.

Proba asociada: proba práctica de campo a través (cross), montado.

• O binomio preséntase equipado e con indumentaria específica.

• Executa unha proba de fondo de concurso completo de equitación 2* (categoría dúas estrelas) cunha distancia de 3.000 m, con 10 obstáculos, segundo o regulamento en vigor da disciplina de Concurso Completo de Equitación.



Organización da proba para acreditar os requisitos de carácter específico:

O alumnado debe elixir e realizar unha das tres opcións de proba práctica (salto, doma clásica ou campo a través) e debe realizar as tres probas de valoración (percorrido de saltos, da reprise, e do percorrido de campo a través).

1. Proba oral (obrigatoria):

1.1. Proba de valoración do percorrido de saltos.

1.2. Proba de valoración da reprise.

1.3. Proba de valoración do percorrido de campo a través (cross).

2. Proba práctica (elección dunha das tres opcións):

Opción 2.1. Proba práctica de salto, montado (para a persoa aspirante que elixa esta disciplina como proba principal).

Opción 2.2. Proba práctica de doma clásica, montado (para a persoa aspirante que elixa esta disciplina como proba principal).

Opción 2.3. Proba práctica de fondo, montado (para a persoa aspirante que elixa esta disciplina como proba principal).

Condicións básicas de realización da proba de carácter específico: espazos e equipamentos. Espazos:

- Aula de 40 a 60 m² .
- Pista de doma mínima de 60×20 m.
- Pista de saltos dun mínimo de 4.000 m² .
- Espazo libre en campo para un percorrido de cross duns 3.000 m de lonxitude con obstáculos fixos.
- Espazo dispoñible para o quecemento nas tres disciplinas.



Equipamentos:

- **Mínimo dun cabalo cada dúas persoas aspirantes ao día con aptitude suficiente para realizar as probas.**
- **Letras identificativas para a pista de doma.**
- **Equipamentos completos de diferentes especialidades.**
- **Xogo de obstáculos en pista para montar 5 verticais e 5 fondos e boleas. Xogo de números identificativos da orde dos obstáculos. Bandeiras vermellas e brancas nos obstáculos.**
- **Mínimo de 10 obstáculos para o cross, dos cales 6, polo menos, serán permanentes. Xogo de números identificativos da orde dos obstáculos. Bandeiras vermellas e brancas para cada obstáculo.**